



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

**Ukraine ya künübo Russia
nunger akumtsü akok: Trump**

**Bengal election nung TMC
kija tokteptsü: Mamata**

VOL. XXII ISSUE NO. 119 (ADOK 119) DIMAPUR RASEMNÜ (WEDNESDAY) TSÜKLAI (FEBRUARY) 12, 2025 ₹ 5.00

Manipur nung President's rule benoktsü akok

Guwahati, February 11, 2025 (Agencies): N. Biren Singh-i Manipur nung Chief Minister menden nungi anenba sülen President's rule benoktsü akok.

Deobarnü Biren-i Manipur Governor Ajay Kumar Bhalla nem pa mapa nungi anenba shidi agüja liasü. Delhi nung pai Union Home Minister Amit Shah den ajuruteper meyipa aruba sülen iba mapa inyak.

Governor Bhalla-i Biren Singh indang shidi agizük saka

inyakyim tasen kar metenzük tashi caretaker chief minister inyaka atatsü shiogo.

Külen, Governor-isa Hombar nungi tenzük agitsü aliba state Assembly session mali kümdaktsüogo.

Osang angazükba agi BJP high commands-i Heirol Assembly constituency nungi MLA Thokchom Radheshyam den jembitepogo aser pai Chief Minister inyaktsü tezüngzüktep agitsü imlar.

NH 129A Package-1 atema senden amen

Dimapur, February 11, 2025 (TYO): Deputy Chief Minister T.R Zeliang-i February 11, 2025 nü National Highway 129A package-1 Peren Town portion atema senden nung aden.

T.R Zeliang-i Planning & Transformation & National Highway portfolios bena lir aser pai iba senden nung tetushi süa jaoker ka ama shilem agiogo.

"Ajak dang tongtipangbji lenmang tajungba akümtsüba lir. Dimapur nungi Chümoukedima tashi lenmang junga yangluogo aser mapa tajung inyaka loktiliba melenshitsü nüngdaker. Nübertem longjemtsüla aser mapa tajung inyaktüsü aser sorkar den yariteptsüla" ta T.R Zeliang-i o jembidang ashi.

National Highway 129A (1 to 5) package nung temenok atema District Administration aser sendaktepa alir nem tashi agüja lir. Peren-i tatemsa mapa tajung inyakba nguogo aser nübertem longjemer jila nung 2- lane road meshiba asangsang nung atalokba atema pelar, ta pai ashi.

Kilometer 2.8 talang lenmang atema Rs. 90+ Crore lemmükja lir saka iba nung damage compensation aser civil cost dena lir. Iba mapatong atema civil cost kija asoshi Rs. 50.5 crore lir ta Deputy Chief Minister-i ashi.

Public-i District Administration den amaliteptsüla

aser tekaratiba nung mapa tenzüksü atema temenok agütsütsüba onük tembangtsü ayongzüker ta paisa ashi.

NHIDCL Head quarter nung Technical Evaluation indang mapa inyakdar aser contractor 4-i NHIDCL Head quarter maparen nung shilem agiogo, ta TR Zeliang-isa ashi.

Iba mapatong ya ita 18 nung renemtsü aser takok ngua inyakba ajanga Peren Town tereprangtsü melenshitsü, ta paisa shisem.

Lenmang tajung aliba ajanga district tejakleni aotsü. Deputy Chief Minister T.R Zeliang lenisüba ajanga iba pungmang asangsang nung ataloker ta Peren Deputy Commissioner Hiazu Meru, NCS-i ashi.

Paisa Peren Town public lennirtemi mapang shia senden amentsü aser nüngdakba nung yariteptsü ayongzüker.

"129A Peren nungi Dimapur section ya Dzukou river Steel bridge (Manipur) border nungi tenzüker aser 7th mile Chumukedima nung tembanger. Iba lenmang ya kilometre 81 shi lira ser packages 6 lemsaa lir" ta Dy. General Manager (Projects) NHIDCL, PMU- Dimapur Anand Kumar-ia ashi.

129A Package-1 Peren Town Portion atema Rs. 106.32 Crores endoktsü ta paisa ashi.

PAC indang Oral Evidence Meeting jateper

Dimapur, February 11, 2025 (TYO): MLA & Committee on Public Accounts Chairman Mhathung Yanthan-i Nagaland Finance Department aser Government Departments balala den senden ka amentsü ayongzükerogo.

February 18 & 19, 2025 anogotem Public Accounts Committee, Nagaland Legislative Assembly indang Oral Evidence Meeting amentsü.

PAC-i 2021-2022 küm

atema Comptroller and Auditor General of India indang State Finances Audit Report aser 2021-22 küm atema C&AG of India on Social, Economic, General & Revenue Sectors report indang kulitem bendentsü. Anungji bangdak Department nung AHOD aser HOD ajak adentsü metetdaksür ta Mhathung Yanthan-i ashi.

Maneni, Committee Members ajak iba senden nung adentsü mepishir ta paisa ashi.

CSAB-i Naga nunger dang JEE 2025 agütsütsü ayongzüker

Kohima, February 11, 2025 (TYO): North Eastern Region nungi engineering courses agitsüpur kaketshir ajema liaka Central Seat Allocation Board (CSAB)-i Mongulbarnü kaketshirtem dang National Institute of Technology (NIT) nung adentsü jaokogo.

Joint Entrance Exam (JEE) Main 2025 nung register süa NIT nung zügang ta CSAB-i m metetdaksü.

JEE Main ajanga engineering institutions nung azüngtsü maongkatem agütsür aser NIT 31 nungi angazükettsü ta CSAB 2025 Organising Committee-i ashi.

Mongulbarnü parnoki Kohima Press Club (KPC) nung osangbener den senden ka nung Chairman Local Organising Committee NIT Rourkela Prof. Anindya Basu, Vice-Chairman Prof. Pankaj Kumar Sa aser CSAB-2025 Media Representative Prof. Surajit Das nunger den Dean Academic, NIT Nagaland Dr Wati Walling aden.

"Lenmang shitak shimtetba, tangazüksü tim angazükba, inyakim beshiba, mapang shitak amshiba aser tangatetba tajung ajanga kaketshirtemi tatidang nung ayongayonga takok angutsü" ta Prof. Basu-i ashi.

JEE (Main) 2025 atema arishi küm telatet mali saka 2023, 2024 nung Class XII (equivalent) mesüra 2025 nung kasa class

nung tatidang agütsürtemi JEE (Main) 2025 agütsütsü akok ta pai ashi.

"JEE Main ya reju tajungtiba nung azüngtsü atema lenmang lir. NIT+ system ta ajaba nung NITs 31, Indian Institutes of Information Technology (IIITs) 26, Schools of Planning and Architecture (SPAs) 3, Government-Funded Technical Institutes (GFTIs) 7 aser IEST, Shibpur 1 dena lir" ta Prof. Pankaj Kumar Sa-i ashi.

Kümshia India nung NITs atema menden 24,000 nungnüa adoker aser NE states nung State Quota for NIT system kübok menden 2,000 shi lemmüktsütsü imlar. Iba den külemi NEUT category kübok menden 740 lir, ta pai ashi.

NE kaketshirtemi tayongzükbater ajuruba ajiteta CSAB-i counselling rounds ajanga maongkatem agütsür. Iba nung CSAB-NEUT (North Eastern States & Union Territory) Round aser CSAB Special Round dena lir ta Prof. Pankaj-isa metetdaksü.

CSAB 2025 team ajanga counselling round nung teyari agütsütsü aser iba atema Nagaland nunga counselling centre ka lir aser linük atema multilingual tele help desk ka lir ta Prof. Basu-ia ashi.

Northeast asoshi menden 2000 shi lir aser NIT Assam aser Tripura nungbo periogo saka

tanungba state 6 nung aliba NITs nungbo menden tazüngtem lir, ta paisa ashi.

NIT nung azüngtsü atema ST/ SC candidate kati 65% marks dang nüngdaker saka tangarbo 75% nüngdaker ta Prof. Basu-i nenshia metetdaksü.

"Chumoukedima district nung aliba NIT Nagaland nung menden 180 aliba nungi 50% ji home quota lir" ta Dr. Wati Walling-i ashi.

Nagaland nung Physics, Chemistry aser Mathematics azünger kanga ajemba den ano aikati NIT lir ta memetetba agi home quota nungbo menden anünger saka tangarbo matar, ta pai ashi.

NIT Nagaland ya India sorkari 2009 nung tenzüksüba lir aser mezüngbo NIT Silchar, Assam campus nungi mapa inyaktüsü tenzüka liasü. Ajisüaka, 2012 nung Chumoukedima nung aliba campus-i belena liasü.

NIT Nagaland nungi kaketshir 1500 shi courses nungi graduate süogo aser 100% placement lir ta Dr. Wati-isa ashi.

NIT Nagaland nung civil engineering, mechanical engineering, electrical and electronics engineering, electronics & communication engineering, computer science & engineering, electronics & instrumental engineering aser Science & Humanities course tem agütsür.

Internet kümdanga aser tamshi shia amshitsü ayongzüker



Dimapur, February 11, 2025 (TYO): February 11, 2025 nü "Safer Internet Day" ta ser State-Level Awareness Workshop ka ayonga agiogo.

Iba sentong ya Directorate of Information Technology & Communication, Kohima nung "Together for a Better Internet" omen nung ajemdaker agi.

"Cyber hygiene indang awareness ya internet kümzüka ayutsüba aser kümdanga amshitsü atema lir" ta Commissioner & Secretary, Information Technology & Communication, Mohammed Ali

Shihab, IAS-i ashi.

"Nagaland nung nisung aikati mobiles phones amshir kechiyong recreation facilities peria mali. Iba ajanga asenoki tanga state tem dang nungi internet talila amshir. Anungji iba sentong nung adenertemi nübertem dang cyber hygiene, online safety practices aser internet tamshi shia amshitsü tesayuba prokshitsü ayongzüker" ta Mohammed Ali Shihab-i ashi.

"Tanü nisung ajaki osangkakettem mesüra online ajanga alima nung kechi ataloker meteter" ta State Informatics

Officer, NIC, I. Lanusangkum Aier-i ashi.

"Osangtsüsang yimjak nung prokshir asünung, karbo tajung, kar majung asütsü akok. Talisa internet ajanga ashikülak mapa kanga inyakteper anungji iba nungi jenbua alitsüla aser internet timi amshitsüla" ta pai ashi.

"Safer Internet Day ya kümshia February ita tanabuba Mongulbar nung amonger. Iba anogomung ya internet timi amshitsü osang prokshitsü atema amonger" ta Information Technology & Communication Director Er. Sabou Yashu-i ashi.

Al-i asen rongsenketzüng aser security yanglushidar : Modi

New Delhi, Tsüklai/February 11 (Agencies): Mongolbarnü Paris AI Action Summit nung Ato Kilonser aser France tir Emmanuel Macron na külemi shilem agiogo.

Senden nung o jembiba mapang PM Modi-i artificial intelligence ya layman oshi nung rasa shia liasü.

PM Modi-isa, arok tejangraba aser lendong balala nungi jenboa alitsü atema artificial intelligence asoshi alima ajunga longjemer governance aser standards ka amenoktsü nüngdakba lemsatepa liasü.

Modi-isa, AI yagi yimden yimsüsüba, rongsenketzüng, security aser lokti melenshitsuðar, ta ashi.

"Asenok tejangraba kümzüka ayutsü, lendong ajangshitsü aliba bentettsü aser kati ka dak tamang kateptsü asoshi alima ajunga longjemer governance aser standard amenoktsüla," ta Modi-i ashi.

Ato Kilonserisa, iba aso nung AI-i humanity indang code züludar, ta ashi.

AI ajanga mapa makai akümtsü ta tsübua bilemba

indang lemsatepba mapang Modi, alima puti otsü reprangdangra technology ajanga mapa sama maoer saka mapa yimya melenshir aser mapa tasen adokdaksür, ta ashi.

"AI-i aniba tarutsü ka asoshi asenoki asen nüburtem nem tasa agütsütsüla aser arangtetsütsüla," ta Modi-isa shisem.

PM Modi ya France tir Emmanuel Macron-i, Elysee Palace, Paris nung dinner mapang agizüka liasü. "Kü tembar aser tir Paris nung ajurutepba atema pelar," ta Modi-i Hombarnü X nung zülutsü.

Chiyongba mapangsa Ato Kilonseri US Vice President JD Vance den ajurutep, shiba AI Summit nung adentsü atema France-i oa lir.

PM Modi Hombarnü France tonga ao aser iba sülen pa US-i aotsü renema lir.

Anogo asem atema France semdangba mapang Modi-i, Macron den külemi AI Action Summit len anitsü, pa den bilateral sensaksem akatsü aser shishilembartem den sensak asemtsü.



MULUNG NEN O



WB.SAKULEPDEN LONGKUMER
19-03:1918 - 03:02:2025

Ozü temeim tsürabur **Sakulepden Longkumer, Akhoya** iba akümüli nung Tsüngremi arishi küm 107 tashi taküm tajung moaja aliba mapang aser pa February 03, 2025 nü iba lima nungi pilaa aoba anogo nung arogo, yimten, lokti tentet, kija-kibong, tembar-medemer aser temeimertem shirnokisa nübo, rongsen aser sarasadem agi ozü tsürabur dang meima yariogo, nenok ajak dang onoki kanga pelaba metetdaksür. Onoki nenok lokti aser kija tenüngteta pelaba meshitetba atema kanga sasar, ajisüaka " Tsüngrem taochi aser Yisu Khrista temeim agi nenok ajak talubosa moajangma," ta onoki sarasademtsür.

Temeim Chirnur, Semchir-semnur, Anük- apang aser Kinungertem.

Bengal election nung TMC kija tokteptsü: Mamata



New Delhi, Tsüklai/February 11 (Agencies): 2026 assembly election nung Trinamool Congress aser Congress na longjemer metokteptsü ta West Bengal chief minister Mamata Banerjee-i ashiba sülen anogo ka lir Shiv Sena (UBT) MP Sanjay Raut-i, lai maneni Congress den sensak asemtsüla, ta ashi

Trinamool Congress tekolakba yagi Delhi aser Haryana assembly election nung Opposition pur tamakok anguba ya Aam Aadmi Party aser Congress na dak tai tongloksüogo aser ashiba agi, 2026 küm West Bengal election nung parnok Congress den longjemer tokteptsü kecha tebilemba mali.

Mamata Banerjee-isa, lar party MLA aser minister tem dang TMC-i 2026 küm menden 284 agi kümtetba state assembly ya two-third majority agi akoktsü ta shiogo.

Uddhav Thackeray-i aniba Shiv Sena lenir Sanjay Raut-i ashiba agi, Banerjee-i aniba Trinamool Congress pur Lok Sabha election parnok kija dang

toktepa arudar. Ajisüaka pai, Congress ya INDIA bloc nung shilem ka asünung TMC leniri Congress den maneni sensak asemtsüla, ta ashi.

Maneni lai, TMC yongtsü nung telok balala lemdangba mesüra raratepba khenyongi magizüksü ta shiogo.

Banerjee-isa, Bharatiya Janata Party puri assembly election akoktsü atema bendanger tenüng züngoksemtsü akok anungji kümküma liang ta lar party lenirtem dang ashi.

Iba den bendenloksema Mamata Banerjee-i, la kinunger shinga mali aser party aser nüburtem ya lar kinunger lir ta shiogo, ta MLA kati ashi.

Senden nung TMC lenirisa, lai state-level nungi booth level tashi aser wing balala nung party unit tem reshuffle sütsütsü ta shiogo.

Lai, ketdangpur tasen shimtsü atema February 25 nü tashi nungbo lenir tejen Arup Biswas nem tenüng asemsem agütsütsü MLA tem dang shiogo.

Jammu nung Army 2 pokset

New Delhi, Tsüklai/February 11 (Agencies): Mongolbarnü Akhnoor sector nung Line of Control (LoC) anasa improvised explosive device (IED) ka apokba sülen captain ka densema Army ana süogo aser ano ka yiruogo, ta ketdangsürtemi metetdaksü.

Iba improvised explosive device (IED) ya kiralongrartemi rema toktsü asütsü ta amanger.

Bomb apokba lendong nung nisung asüba osang Army-i jangjatsüogo aser ashiba agi, sepaitemi iba tesem meketbangogo aser meita aoba sentong tenzükogo.

Ketdangsürtemi ashiba agi, sepaitem ya patrolling duty nung aliba mapang Bhattal tesem kübok forward post ka anasa 3:50 ako nung iba bomb yagi kongshia liasü.

Lendong nung yirur tem

mozüki kati aritepa anir ao, kong captain ka densema sepai ka süatok ta parnoki ashiba den, lendong nung yirur aliba sepai tasembuba temang tajungba lir aser lendong nungi jenbogo.

Jammu nung amendaker aliba Army White Knight Corps unit-i, sepai anati pei taküm bendanga agütsüba atema tetushi agütsüogo.

"Akhnoor Sector kübok Laleali tesem nung Improvised Explosive Device ka apokba sülen nisung ana süogo. Onok sepaitemi iba tesem meketbangogo aser meita ao tenzükogo.

"White Knight Corps-i sepai ana nem ya tenati tena taküm bendanga agütsüba atema tetushi agütsür," ta X ajanga parnoki metetdaksü. Bomb apokba tesem temeket ajak metekbanger lir, ta ketdangsürtemi ashi.

Punjab CM-i Congress lenir Partap nem telangzüba agütsü

New Delhi, Tsüklai/February 11 (Agencies): Congress lenir Partap Singh Bajwa-i, Aam Aadmi Party (AAP) MLA 30-i pa den tongtepratepdar ta ashiba dak sendakba nung Punjab chief minister Bhagwant Mann-i Mongolbarnü telangzüba agütsüogo.

"Pratap Singh Bajwa-i iba ya küm asem shi shia arudar. Pai kechi jembiner jembidakjang. Ni Pratap Singh Bajwa dang Delhi nung parnok (Congress) MLA kwi lir ta dang asüngdangner," ta Mann-i osangbenertem dang ashi.

Mann-i ashiba agi, "Pai (Bajwa) taoba mapanga MLA 20 nungi 40 tsüngdai pa den tongtepratepdar ta shiogo. Pai kechi shiner shidakjang. Onoki iba party ya, state kübok yimtsüng aser jila balalai oa nüburtem den ajurutepa onok asentzü aser azü tenla tentetogo."

Delhi assembly elections nung AAP pur tamakok anguba sülen Bajwa-i ashiba agi, Punjab Chief Minister Bhagwant Mann aser AAP tekolakba Arvind Kejriwal na yongtsü nung mepetmesü adoktsü. Paisa, AAP MLA 30-i Congress den tongtepratepdar aser party melentsü renema lir ta ashi.

Ajisüaka Congress MP Pramod Tiwari-i ashiba agi AAP MLA tem BJP mesüra Congress den sendaktepa mali.

Pai ashiba agi, Congress-i tangar party lemdangtsüba pu masemer saka Punjab nung yimden yimsüsüba tsütsü tensa asadangdar.

"BJP-i horse-trading aser party lemdangtsüba nung shilem agir aser aji onoki Maharashtra, Goa, Manipur nunga nguogo. Parnoki Punjab nunga inyaktsü merangtsü. Congress dak sendakba nung onoki party raksatsüba dak tamang makar. Onok party state lenirtemi tensa asadangdar," ta Tiwari-i ashi.

Mongolbarnü New Delhi kübok Kapurthala House nung AAP national convenor Arvind Kejriwal den ajurutepogo. AAP yongtsü nung tebandang adoker lir ta osang adoker aliba mapang iba senden ya mena liasü.

"Onok MLA tem tongogo aser party national convenor Arvind Kejriwal den senden ka menogo. Delhi Assembly elections mapang nüboyimtsüba atema pai parnok ajak dang kanga pelaba lemsatep. Punjab nung ozü sorkari nüburtem ajangzükdaksütsü atema inyaka arudar. Onoki takaratiba nung inyaktsü nüngdaker. Takok anguba aser tamako anguba ya asaya nung shilem ka lir. Delhi nung aliba nüburtemi parnok asoshi mapa inyaktsürtem ama onok bilemteter. Punjab nung ano onok küm ana anunga lir. Onoki Punjab ya model tajung ka kümdaktsütsü," ta Mann-i ashi.



TIR YIMYIM YIMOBILEM (EDITORIAL)

DIMAPUR RASEMNÜ, FEBRUARY (TSÜKLAI) 12, 2025

Kibong tasen temoatsü aser tebilemtsü

Tanü asüng tsüraburtem atema nümadangtsü aser mulungsüngzüksü mapa tajung kaji pei chirnurtem aiür asangur küma intetdaksür külen temeshi kiyimba kulizüng agia kibong akümba ya lir. Atangji, tanur ka kibong küma yoktsübaji tsürabur aika asoshi khuret tulur lir, kechiyong tanü asüng kiyir benjong ayongzüka lokti chiyongdaksütsübaji temela masü. Ibayongji, tanü asüng lanurtem aikati peisasa küpteta kiyir benjong ayongzüka kibong akümtsü asoshi meranga inyaker. Atangji, asen sobaliba nung, akhidang nungi kibong tasen akümtsü asoshi, talisa, kiyimsangi khuret tulubaka tongzüker. Aji oda, kiyimsangbo kibong akümtsüba kümba kiyir benjong chiyongdaksütsübaji dang masü saka tetsür anioka alitsü asoshi kiyimki asütsü aser kibong kümer inyaka chiyongtsü atema alu tasen chia kiyimlu ayimtsü. Iba sobalibaji tebur asoshi ozüng amai, kechisüdirsüaka tebur süra itemjibo inyaktettsüla, aji mesüra kibong mekümtettsü. Atangji, tanübo asangur aikati kiyimki mesüteter aser kiyimlua meyimteter, kechiyong akhi putu nung ama masü tanü asüng ki asütsübaji temela masü aser alu ayimtsübajia tasak, ajisüaka tanü asüng lanurtem aika tsüraburtem danga tajungba, Tsüngrem tsübuba aser meranga inyakba aiür asangurtem aika lir, anungji parnokibo pei tsüraburtem nem timtem balaka magütsü parnoksa küpteta kibong akümer. Item lanurtem kibong asoshi balaka shisabolutsü mali, kechiyong parnok yabo parnoksa inyaka pei taküm aser kibong litetba purtem lir. Ajisüaka, tsüraburtem kariibo pei chirnur tali meimba agi, anungdang tashi mejangdaksüba lanur aser kidang süngo meyangludaksü, anungji suruchioktsüjibo yutsür süngo yanglua mashiba lanurtem kibong kümdaksür. Itemji kibong kümer kidang peisasa soruchioka mechiyongtet timatemer aser kibong kümli nungi apuani na meputep tenzüker. Ano, kibong tasen nung item tebilemtsüji dangbo masü, lanur tajung aika liaka, ano tamajungpurtema lir, anungji lanur karbo yi aser mozümora chia aliba metoktsütet ser kibong akümeritem lir. Itemji shisabolutsüka lir. Aji oda, yi aser mozü lar kati kibong nung tokolak mesütettsü, anungji yi aser mozü jagi kibongji kibong tenzükli meyokadoktsü. Aji oda, Dimapur nung yakanü kibong tasen, kibong kümer ita asem nung tebubai tebuttsü tepsettsüsa atalokba lendong jagi asenok tsürabur aser lanurtem mulungjang nung tasüngdangba aika agütsür. Tanü asen loktiliba nung iba tashi atalokbaji asenok ajak asoshi tebilemtsü tuluka asütsü. Aiben asenoki lanur kibong tasentem nung süngo yanglua mejemtetba indang menüja jembir mesüra lanurtem kibong tasen karbo mozümora achir aser yi ajemertem aser ayokertema lir, saka asenoki parnok asoshi kecha khuretsa mebilemtsür. Iba jagi Tsüngrem tenüng nung kibong kümtsür yokba to Tsüngrem maden ser kibong tenzüker. Ibaji kibong tasen kija tebilemtsü masü lokti tebilemtsü akümer. Item ama peisasa pei taküm mazüoktetba ajanga timtemi aiertem kümzüksü asoshi asenok lokti aser arogoi süoki ia bilemtsüla. Tanübo, talisa, Kohima, Dimapur aser Chümoukedima district-tem nungbo anogo nung kiyir benjong asem pezü nung adentsüsa adoker, anungji akok tashi adentsü meranger, kechiyong temeshi kiyimba agitettsüsa aiür aser asangur taküm meraksai asüngteta litetba takümji takok tulu angur taküm, parnok nemji akhüm, tenüngsang aser temoatsü agütsütsü tim. Parnok kiyir benjong nung senotsü endokba aser asenok kiyir benjonglen senzüdang belemba jenjang dang nungi kanga agia tali asen jala aser jabasotemi pei taküm peisasa azüoka litetba jenjangji lir. Iba amaji Tsüngrem aser nisung tsüngdang tagizüktettsü taküm aser kibong kümer parnoksa parnok kibongji nübortem asoshi temoatsü küma oa litettsü atema, asen jala aser jabasotem asen den alidang, sarasademba, mejangba aser sakba, peisasa süngo yangluba aser soruchiokba, shi aser ango awazüba, peisasa pei süoshi shitokba, ki aokba aser peisasa pei tsüngsem meyuba mapatem inyakdaksütsüla. Itemji taküm lia aotsüba mapa, life skill-tem lir.

OLEMSABANG

TANÜ ASEN AOR TESOTET SAMANIR APA-A AKÜM MASÜA NA?

~ L. IMLIKOKBA IMSONG, UNGMA

Ni ya tesotet samanir chir-a masü aser semchir-a masü, saka ni amala nüburtem aikasa lir aser item asoshi tesotet samanir nüngdaker. Oboula aser obala nunger tensa mapangbo samanir liasüji, Naga nunger asoshi dang masü, saka International level tashi nung samanir liasüba otsü anguba aser angashidang, tanübo asen Aor kechi tensa nung odar ta kanga nemjema shisadangba iba osangkaket ajanga lemsateper. Tongmelang agi tatishitsü tongtimbang wadang kar lemsateper.

1. Asenoki amangba Khristan yimsü ya otsü nung anguba agi küm aika tejakdang (asen limai matudang) Burma-i aitsü atema Assam aser Arunachal ajanga aitsü merangdangba (American Baptist Mission) mokoktetbaji Tsüngremibo asen Ao lima shimteta liasü ta shisadanger. Kechiyong tenem lima nung alir meimchirtem jagi kasa meimchir Tsüngremi yangluba nisung ka kolak lepzük agiang konang ta züngshiba tensa. Iba limai nemketa atusübaji kodaka tetsübuttsü liasü. Saka Tsüngremer sentongbo (Ao kin dang aochiba) liasü ta shisadanger. Aser iba yimsü tasenji (Khristan yimsü) shir-i aser yim-i tasü itta agizük, aser züina ao asenok ajaki meteta lir. Tatishitsü agi; Molungkimong nunger Süpongmereni anir par yimer nungi lenir aika adok. Par samanirtem jagi Pastor-a, Reverend-a aser missionary-a timtim-a machi majem arema (kechiyong konang nüngsang wadang ka atema masü) tenzükba ya tashi inyaktet no! ta shisadanger. Tanem tanemi asen Tzüla (Dikhu) ayong ajanga aotsü mulungteta par America nunger denji külemi asenok Aor rongnunga Rev. Kijungluba-i anir aika rongnung Semalepzüng ama, aser ano aikadi Khrista yimsü asoshiji merangtepa inyaka züindaktsü. Aser par samanirtem jagi taah talang angutsü aser konang angutsübo toktsür taah meliaka aser chiyungtsü-a jenjang-menjang, mendi aser manü aser shi amala chi-chiyung melen chia jema aremteta yimsü denji kakat shisatsü angazükdakja tenzükba otsü angashir. Aser taküm libalirutsü nung Tsüngrem ka lir, anungji, ibaji akümtsbua ochi shia kadi ka den tebutep nung alitsü tesayuba agütsü nung aji oda, paria angazük aser benshi. Saka tanü koda kechi jenjang nung ali? Yimsü aser kakat shisatsü SAMANIR semchirtem to tanübo district paika nungji Government mapa nung department balala nung Head of the Department-i anir kwikasa küm kwika inyaka arudar? Machi marem aremtsübo toktsür na ajanga sen kwi angur aser tekaden süa lemsar aji ne dang meshiaka tangu dang aser aji meteta lir. Kibongbo Dimapur, Mokokchung, Kohima nung amenoka yur ita nung khen mesüra khen-a modangi sen chia kibong mesür. Saka aji ilen jagi aortem dang masü ajaklen yamaji liteper. Ochi indang aser timi alitsü tesayubato (Samanir tsüngnep ayimbangtsüba) meyiper lia sayurjia ileni anga or nung ta mangmangdaksür. Au, mashilenbaji angazüker-a tia maka ako (asenok aibelenertem mesüka). Iba Khristan yimsü samanir Aorji pei lima nungbo yutsür International level tashi nung samanir aikasa liasü. Tatishitsükar; Dr. I. Ben Wati, Rev. Imo Aier, Dr. Renthly Keitzar, Rev. Longritangjet, aser ano aika. Parnoki alima ajunga nung lenibaji kokteta bener otetba otsü tanü tashi lirko. Item ajakji Tsüngrem taochi aser temoatsü ta bilemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Boko Haram-i Nigeria nung pastor den tamanger ana tepset



Rev. Bala Galadima, ECWA pastor ya Boko Haram teloki Gombe state, Nigeria nung February 9, 2025 nü tepset.

Abuja, Tsüklai/February 11 (Agencies): Islamic extremist telok Boko Haram südi ta temulung melemteni aliba teloki February 9, 2025 nü Gombe state, Nigeria nung pastor ka par kidang lia tepset, aser iba linük northeast tsütsü azüdokshi ajanga nüburtem maneni amokmerener, ta osangtem ajanga ashir.

Evangelical Church Winning All (ECWA) nungi Rev. Bala Galadima ya Lubo nung February 9, 2025 anepdang 1:00 ako meta khaset, ta yangji aliba ECWA arogopuri ashi. Prangbong bena alirtem ya sü tanak agi meyr Lubo, Yamaltu-Deba County nung ECWA telungzük nung par kidangi nungboka ait aser pa yipten nung mejanga lia injang khaloktsü.

Arogopuri ashiba agi, kiralongrar tem ya jilai injang anünglen khashishia ait. Parnok mezüngbo Pastor Galadima'er ki ta bilema ki danga kati ao aser par ki kong ali ta asüngdanga parnok dang prangbong agi tuiten sen meshi aser ECWA

aliba tesem bushia ao.

"Onok temulung raksar lir, kechiaser ozü pastor Rev. Bala Galadima tepseter onok kisüng lir," ta arogo züngsem Lami Sabo-i ashi.

"Pa tasü aitba, pai sayutsüngiba aser temeim sayuba onoki kanga menungratsü."

Pastor asüba ajanga arogo kanga mejungi anokshitsüogo, ta lai ashi.

"ECWA Church Lubo nung züngsem temi pa kanga menungratsü. Kibuba nung ozü lemur Rev. Bala Galadima dang tatem salem ashitsü kanga tasak lir," ta Sabo-i ashi.

Nisung tepseter jena aoba sülen ketdangsürtem tekülem ki bushia aru, ta Gombe State Police Command nungi Buhari Abdullahi-i ashi.

"Gombe State Commissioner of Police Bello Yahaya-i mozüki semdang, kong pastor tasü mang yua lir aser iba tesem nung special squad police tem yoka lir. Onoki special operation tenzükogo aser aibelener aputsü tamang kateta lir," ta Abdullahi-i ashi.

Anasa Borno state nunga Boko Haram telungpuri January ita Chibok County maka Khristanpur ana tepset aser ano ana yirutsür tekülem ki pongu den nisung aliba ki 74 rongdoktsü, ta yangji alirtemi ashi.

Kasa mapang Nigeria sorkari Borno state nung military operation mapang apuba Boko Haram kiralongrar 5,000 January 30 nü chioka parnok 'de-radicalized' süogo aser parnok tai temenen nangzükogo ta ashi. Kasa anogo Boko

Haram telok Chibok County kübok Kauthlama yimtsüng maka Church of the Brethren in Nigeria (EYN) tekülem ki ka rongdoktsü, ta yangji alir Paul Mauntah-i ashi.

"Ibai January 30, 2025 anüngdang 11:46 ako nung Kauthlama B nung atalokba osang lir. Tia maka Boko Haram kiralongrari tekülem ki ka den dokan ishika rongdoktsü aser nashi, sakoli aser san densema kiset shiruru pua bener ao."

Aiben teyari meshiaka ketdangsür temi telangzüba magütsü, ta pai ashi.

"Chibok LGA nung aliba nüburtem teyari aser tekumzükba kanga nüngdaka lir. Tensa majungba ajanga nüburtem kanga tim atemer, aser asen lenirtemi mera tajung agia rara adokba tera makepdoktsü aser timtem ajurur alir nem teyari peria agitsütsü tim," ta Mauntah-i ashi.

January 16 nüa Boko Haram telungpuri Chibok Cout kübok Yimirmugza yimtsüng maka EYN tekülem ki rongdoktsü, ta yangji alir James Ayuba-i ashi.

Yangji alir Moses Hameed-ia iba lendong atalokba jangjaogo aser ano telungpur temi Chibok County kübok Bamzir, Njilang aser Shikarkir yimtsüngtema amak ta ashi.

Telungpur temi Khristanpur timba aliba Zillang yimtsüng ya January 13 aonung 11:30 ako nungi tasüngnep 4:00 ako tashi amak, ta Hameed-i ashi.

Bamzir nung alir Iliya Dauda-ia par yimtsüng ya January 12 anepdang 2:00 ako meta Boko Haram kiralongrar

temi maka EYN tekülem ki ka raksatsü aser iba arogo nung züngsem ana tepset ta ashi.

"Iba mapang kiralongrar temi EYN arogo nung züngsem aser adianu Enoch Pogu Pudza aser Josiah Pogu Pudza tepset. Yimtsüng nung EYN indang tekülem ki kiralongrar temi rongdoktsü," ta Dauda-i ashi.

Khristan tsür Esther Yohanna dak kiralongrar temi injang khalokja yirutsü aser ano ki ter dak tema rongdoktsü, ta pai ashi.

Chibok Local Government Council indang chairman Mustapha Madu-ia iba yimtsüng nung Boko Haram kiralongrari amak ta ashi.

Khristanpur dak Boko Haram kiralongrar-i tanen makai amakdang item kiralongrar kar 'de-radicalized' sütsüogo ta shir chiokba ajanga kanga jashir, ta EYN züngsem Amos Dauda-i ashi.

"Sorkar ketdangsür aser security agency temi southern Borno areas nung Boko Haram tashi mait kumogo ta jembiba aser Chibok Local Government

Area kübok Bamjir, Shikarkir Njilang aser Yimirmugza nung amakba meputeper," ta Dauda-i ashi.

Hopta ana tsüngta nisung takum jenti laluogo aser ki o jen aika raksatsüogo.

"Tekülem ki, nisung aliba ki aser chiyongtsü rizünga aliba tesemtem mitsü kuma rongdoktsür nisung aika jenokdak ki, chiyongtsü mesüra tekülem ki maka kumogo. Tang nüburtem kanga tim atemer aser chiyongtsüa mangur," ta paisa ashi.

Borno state commissioner for information and internal security, Usman Tar-i sangdong ka nung, Chibok kübok Bamzir, Njilang, Shikarkir aser Yimirmugza yimtsüngtem amakdang nisung pongu tepset, ana yiru aser sen naira million aika jenjang ki o jen raksatsüogo, ta ashi.

Open Doors ajanga alima nung Khristanpur alitsü linük tamajungtiba 50 asadangba 2025 World Watch List nung Nigeria ya jenjang tenet buba nung lir.

ANOGO ABEN TSÜNGREM DEN

TSÜNGREMI MAMADOKER

Tetsüri pei nu menden nungi anguba tanur dang aria mebilemtsü ma? Itemi amadokaka, aji saka ni bo na mamatsü. ~ **Isaiah 49:15**

Küm ka nungi küm ka ta tainba akümdang asenok ali meimchirtem amatari agi kanga bulua akümer. Khen khen tila tari amaba taküm nung ajangshir aser khen khenbo amatari ajanga taküm kibong nung takoksa tulu ataloktsüsa tia jenjang kati meneper. Saka tanü Lai o ajanga asenok nem teimla ka agütsür aser aji aseni amangba Tsüngremi kodanga asenok mesentoktsü aser mamar. Isreal nüburtem aika teimla makai joko Kibubai pamok senzuka doktsüogo aser amadokogo ta bilemaba mapang ka nung Isaia ainkar ajanga Tsüngremer tawabangba teka teti parnok den lir ta ajungshiba angur. Tetsü kati koma pei tanür kodanga mamadoker, mesüra tetsü kari yamaji inyaka amadokaga asen Tsüngremibo kodanga mamatsü ta ashir. Kechiyong Tsüngremi ashir, "Ajiang, Kü kabu nung ni na ajenloka lir; ne jaratem maneni kü den lir." v16 Mapang aben Isreal nüburtemi Tsüngrem anema noktaka pai tenüng teta jatetba Isreal kin kodanga mamadok. Parnok teti aser tatem maka Pa meyong liasü.

Adianu tajungtem, Tsüngremi, "parnok Kü meyong" tasüba rong nung anata tena lir. Pai asenok tenüng agi meteta lir aser pai kodanga mamadoker. Koda tepelatsü tulu! Na aser nia pa meteta lir ma Arung kodanga mamadokba Tsüngrem dak azüiter taküm alitsü asen nükjidong südi.

Manipur yimtenren melenshiba Khristanpuri pela agizüker

Imphal, Tsükali/February 11 (Agencies): Manipur state nung küm ana jungnüa azüdokshiba nung Khristanpur timba sür nisung 250 dak tema takum samaba sülen iba state chief minister mapa nungi anenba Khristan lenirtemi pela agizükogo.

Manipur nung Kuki tribal Khristanpur aser Hindu nunger timba aliba Meitei nüburtem tsüngta tang tashi mepetmesü adoka alidang Chief Minister Biren Singh-i pa mapa yutsüba shiti ya Governor Ajay Kumar Bhalla nem February 9, 2025 nü agüja liasü.

Pa mapa yutsüba ya azüdokshi agi sünger aliba state ajungtsü asoshi mera tajung ka lir, ta Khristan lenir kati ashi.

"Tang Manipur nung nüburtem takum tesama tia nung aliba shia arudakja yimjung arudaktsütsü teimla lir," ta arogo lenirtemi UCA News dang February 10, 2025 nü ashi.

Nisung million 3.2 aliba state tilaka nungya Meitei aser

lisopur Kuki nunger tsüngta May 3, 2023 nü nungi mepetmesü adoka tensa mejungi arur. Kuki nunger ya Manipur nung kin tila saka Khristanpur timba lir.

Meitei nunger nem tribal jenjang agütsütsü Biren Singh'er sorkari telemtetba agiba anema longkak aitdang Meitei nungeri lisopur Khristantem dak amakba sülen azüdokshi ya tenzük.

Kuki nungeri ashiba agi, iba jenjang agütsüba ajanga Hindu Meitei nungeri tajemzükba jenjang nung alirtem asoshi agütsüba teyari ajak agitsü. Meitei nunger ya takataiter aser yimten yimsüsüba tsütsüa tashi lir ama züngshir.

Rongrong manener aser nisung aliba ki 11,000 aser tekülem ki 360 shi rongdoktsüogo aser schools, presbyteries aser danga office tem densema arogo meyong reju balala raksatsü.

Singh-i iba azüdokshi yarir ta Kuki nunger temi aitsür aser pa menden nungi alutsü

khanga liasü, shiba Meitei nunger lir.

Ajisüaka Singh-i memulungi aru aser Hindu nunger bhukumba BJP-i aniba par sorkari yimjung asoshi akok tashi inyaker ta shia liasü.

"Sorkar nung lenir ka ama Singh aliba ya state nung yimjung asoshi temetsüdaktsü long tuluka liasü, kechiaser Kuki-Zo nungeri kodanga pa dak temulung malem," ta ano Khristan lenir kati ashi.

"Singh yagi par nübur (Meitei) nunger atema kisüng bilema inyaka. Anungji tanü tashi yimjung len o jembiba nung terenlok mali," ta arogo lenir kati ashi.

Tangbo state nung yimjung tanaben arudaktsütsü asoshi central sorkari tapet mera agitsü imlar ta pai ashi.

Manipur state nütsüng yongsük shilem 53 jungnüa Meitei nunger lir aser parnoki state lenden ajunga amokbanger lir aser lisopur ya shilem 41 aser parnok ya tenemlen alir.

AO OSHI ANGAZÜKDAK:**TANÜ ANGAZÜKTSÜBA OJANG**

Tejaksa

(adj) tali renemtet, asüküm yimya, sentsü tali (garish, lurid)

*Tejaksa yimya aketba nisung aikati maginer.

Tejakshiyu

(v) metettepba, nguyutep (introduce amongst people)

* Senden nung tejakshiyutep mapang ka agiba ya junger.



Tir Yimyim

OLONG PAITEP # 7061

1				2				3		4
5		6								
							7			
8										
										9
		10				11				
				12				13		
14										
						15				
16										

TIPLÉN

2. Auonung chiyongtsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7060 TELANGZÜBA**TIPLÉN :**

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret,
17. Sang.

LANGTSÜNGLEN :

1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.

NAI-A YA METETTER MA

American Grant Fisher-i Millrose Games, New York nung world indoor 3,000 meters record ajatetogo. Fisher-i Olympic 1,500 meters champion Cole Hocker den toktepdang 7 minutes, 22.91 seconds nung asemtefa otsü tasen yanglua liasü.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur nung CIOs akangshia inyakdang telungpur 14 apu

Imphal, February 11, 2025 (Agencies): Sepaitemi Manipur nung counter-insurgency operations (CIOs) maparen akangshiogo aser tesem balala nung telungpur 14 tashi apu.

Manipur-Myanmar arrtsülen nungi mapa inyakba telungpur teloktem nungi züngsemtem den prangpong-injang 30 tashi puogo.

January 27 nungi 31, 2025 tashi Manipur nung telungpurtem aser Kuki National Army of Burma (Myanmar) tsüngda khatepba sülen India sepaitemi iba mapa inyak.

Telungpurtem Border Pillars 85, 86, aser 87 nung khatep aser tatalokba balala nung nisung 20 asü.

India-i CIO akangshia inyakdang Myanmar den arrtsüa aliba L Minou ridgeline nung mita aodang Kangleipak Community Party (Taibanganba) züngsem 6 apu. Parnok ket nungi prangpong-injangtem ngutetogo.

Parnok züngsema February 2 nungi 9, 2025 tsüngda Manipur valley nung telungpur telok balala nungi züngsem 14 tashi tashi puogo.

Sepaitemi tesüsabuba apurtemji RK Ingo Singh (42),

Oinam Herojit (28), Salam Sushil Singh (23), Hijam Mani Meitei (31), Samjetsabam Manisana Meitei (43) aser tanur ka dena lir.

Telungpurtem ket nungi 7.62 mm LMG rifle, 7.62mm SLR rifle, 5.56mm INSAS rifles, 7.62mm AK 47 rifle, 7.62mm LMG Magazine, 7.62mm SLR Magazine, 5.56mm INSAS LMG Magazine, 7.62mm AK 47 magazine, Passive Night Sight, 96 rounds 7.62mm SLR, 268 rounds 7.62mm LMG, 206 5.56mm INSAS, 7.62mm AK Ammunition, Bullet proof jackets, Bulletproof plates aser Mobile phones 7 ngutetogo.

2026 Assam elections atema Opposition longjemtsü ayongzüker

Guwahati, February 11, 2025 (Agencies): 2026 Assam Assembly elections nung opposition longjemter BJP den tokteptsü atema Rajior Dal president aser Sivasagar MLA Akhil Gogoi-i mepishio.

Pai opposition party ajak longjemter BJP den tokteptsü ayongzüker.

Delhi aser Haryana elections nung opposition longjemter BJP anema toktepogo. Ajisüaka opposition party temi külemi yariteptsü ano tangatetba ka

mali ta Sivasagar nung osangbener den jembidang Gogoi-iashi.

"Opposition party temi o agi jembiba dak alaka akangakanga longjemtsü mapa meinyaker. BJP ya tashi tulu ka lir aser külemi menokdakra democracy kümzüka ayutsüba ya mapa tasak asütsü" ta pai ashi.

Party sasep nung tashi itshiba jagi meperir. Longjema aliba opposition front kati election nung tajangzüker angutsü ta Gogoi-isa shisem.

Congress party sasep nung mangatettep aliba agentsüla aser opposition teloktep tajung ka len anitsüla. 2026 elections atema opposition party ajak senden ka ayonga amentsü junger ta paisa metetdaksü.

Rajior Dal-i kija mesüra teloktep nung dener toktepang, taruba elections nung menden teimba nung takok angutsü. Opposition longjemba agi dang BJP den tokteptsü akok ta Akhil Gogoi-isa metetdaksü.

Tripura CM-i Centre dang tzümetsüng atema yariteptsü mepishir

Agartala, February 11, 2025 (Agencies): Tripura nung yaküm tzümetsüng timtem ajurudang Rs. 15,000 crore akoksaogo aser iba atema Centre den senotsü teyari meshir ta Chief Minister Manik Saha-i ashi.

Centre-i tzümetsüng lendong atalokdang NDRF aser helicopters yoka akokba tashi yaritepogo ta pai ashi.

"Sorkari mepishiba sülen Centre-i tzümetsüng agi teraksa bentsür aruba asadangtsü

atema anaben tashi inter ministerial team yokogo. Tzümetsüng ajanga Rs 15,000 crore shi alang kiojen raksatsüogo" ta CM Saha-i ashi.

"Tang nüngdakattem inyaktü atema state senpong nungi Rs 563 crore endokogo. Ni Centre den senotsü teyari meshidar aser inyakyim lateta aliba ama Centre-i teyari agütsütsü imlar" ta CM Saha-i flood relief and management programme ka nung jembidang ashi.

Yaküm August aser

September itatem Tripura tzümetsüng nung nisung 38 taküm sama aser lakh 17 shi dak kongshi. Tzümetsüng ajanga state nung Rs 15,000 crore akoksaogo.

"Tripura nung ayong 12 nungi 11 tashi danger level aten aser Sepahijala, Gumati o South Tripura district tem kanga mejungi metsümbanga liasü. Onoki relief camps 889 lapok aser idakji nisung lakh 4 shi anenzükdaksü" ta CM Saha-i ashi.

Tripura kübok Dhalai district nung police-i nisung ana ket nungi Rs 28 crore alang Yaba süngjang apuba sülen agiba noksa ka angur. Osang tejangja ka angazükba sülen Bet Bagan tesem nung Assam nungi aruba gari ka soter mita repringdang oil tank ja ka nung Yaba süngjang lakh 9.24 shi bena aliba angu aser iba indang jenjangji Rs 28 crore shi asütsü ta asadangtetogo ta Dhalai District Superintendent of Police Mihir Lal Das-i ashi.



North Korea-i tekümdangtsü metetdaktsü

Pyongyang, Tsüklai/February 11 (Agencies): South Korea nung Busan yimti kübok rongnendak US Navy fast-attack nuclear submarine ka anenba sülen North Korea-i, nüngdak dang süra military jenjang agitsü atema parnok renema lir ta shiogo. Parnokisa national security amokmerenba atema United States aitsüogo.

Ministry of Defence-i sandong ka ajanga ashiba agi, Korean Peninsula nung US indang nuclear submarine ka anena ayuba ajanga US-i raratsü jazükba sayur ta North Korea state meyong KCNA news agency-i Mongolbarnü sangdong ka ajanga metetdaktsü

"US-i mekümdangi lendong keta military jenjang agiba süoki ia bilemba lemsateper, kechiyong iba jenjang agiba ajanga Korean Peninsula nung military tsütsü mangatettep aliba ya shitakba rara dangi anitsü akok," ta kasa sangdong ajanga metetdaktsü.

Ministry-isa, North Korea

rongshirtem merenshitsü asoshi kecha marendaki parnok temeden amshitsü ta ashiba den, tashi ajanga tesem ka azüoktettsü ta amangba atema US aija liasü.

USS Alexandria submarine ya supply atema aser crew nem anisüngzük agütsütsü asoshi Busan rongnendak Hombarnü anenogo, ta South Korea indang Defence Ministry-i metetdaktsü.

Iba submarine anenzükba ajanga South Korea aser US navy osang balala lemsateptsü aser longjemer inyaksü atema tasa yanglutsü asoshi maongka agütsütsü, ta ministry-i shisem.

USS Alexandria ya US indang Pacific Fleet nung shilem ka lir aser iba submarine ya fast-attack, nuclear-powered submarine ka lir kong Tomahawk cruise missiles bena lir.

Kasa mapang nung South Korea indang Armed Forces-i, North Korea sorkar taitsuba dak sendakba nung telangzüba agütsütsü

memulungi liasü.

Pyongyang-i ashiba agi, US-South Korea military inyakyim ajanga Korean Peninsula nung yimjung amokmerener aser iba ya North Korea amaktsü asoshi renemshiba ka ama agizüker ta shia arudar.

Deobarnü North Korea-i, linük arrtsü nungi mile 16 dang pilar US aser South Korea nati military exercise balala ayongzüka agiba sülen telangzüba tesashi agütsütsü ta tekümdangtsü metetdaktsü.

US tir Donald Trump taoba ita tir akümba sülen pai Kim Jong Un den indang indang sensak asemtsü atema tongteprateptsü ta shiogo.

US-i tenokdangba tesashi agütsüba den mapang mapangshia tenüng balala jatepaka Trump aser Kim na Trump mezüngbuba term nung tesendaktep tashi ita liasü.

2018 aser 2019 tsüngda Trump-i Kim den asemben ajurutep aser pa ya 1953 küm sülen North Korea-i aoba mezüngbuba tir aküm.

Afghanistan bomb lendong nung nisung 5 asü



Kabul, Tsüklai/February 11 (Agencies): Northeastern Afghanistan nung bomb ka apokba sülen nisung pongu pokset aser tenet yirua liasü, ta local police-i metetdaktsü.

Iba bomb ya Mongolbarnü Kunduz province nung Kabul Bank branch ka anasa anepdang 8:35 nung apok. Iba bomb pokdaktsüba indang telok kati danga nangzüka mali.

Bank indang security guard ka den civilian aser Taliban züngsem pezü tepseta liasü, ta police-isa metetdaktsü.

"Pei temang nung bomb alenoker pokdaktsür kati pai bena aliba bomb pokdakja liasü," ta Kunduz province police otongdar Jumadin Khaksar-i ashi.

"Iba lendong bener arutsür bushiteta obendangtsü asoshi Kunduz province police-i tanga lokti tentet tapet den inyaksangshidar," ta pai shisem.

United States atsüinginba aser parnoki teyari agütsüba sorkar 2021 küm August ita Taliban-i atsüingtokba sülen Afghanistan nung bomb pokdaktsüba aser Pei temang nung bomb alenoker pokdaktsürtemi tesem balala amakba tajemba kümogo.

Ajisüaka ISIL (ISIS) densema kiralongrar telok aikati linük amokmerena

arudar.

2021 küm October ita Kunduz kübok Shia mosque nung bomb ka pokdaktsüba sülen nisung aika asü aser iba bomb pokdaktsüba ya Khorasan Province (ISKP) nung ISIL den sendaktepa aliba teloki nangzüka liasü.

Taoba küm March ita-a pei temang nung bomb alenoker pokdaktsür kati Kandahar yimti nung bank ka kima bomb pokdaktsüba sülen nisung asem tepset, koba ISIL-i parnok mapa ta nangzüka liasü.

Tesem balala aiben makaka Taliban ketdangsürtemi, parnoki iba telok tuluba ka raksatsüogo, ta shia arudar.

Ukraine ya künübo Russia nunger akumtsü akok: Trump

Washington, Tsüklai/February 11 (Agencies): United States Tir Donald Trump-i Russia aser Ukraine tsüngta raraba tekeratiba nung tatem kati arudaktsütsü ta nangzükba ama asangsang kumdaktsütsü merangba mapang Ukraine ya künü anogo Russia nunger akumtsü akok, ta ashi.

Hombarnü sensaksem ka nung Russia-i tashi ajak amshia küm asem Ukraine amakba indang jembidang Trump-i iba olen ya shia liasü.

Kasa mapang Kyiv-ia Washington-i maneni mitkar aser senotsü teyari agütsütsüsa tezüngzüktep agitsü renema aliba amai yimya kar ajanga sayur.

"Parnoki tezüngzüktep ka yanglutsüa ako, meyanglutsüa akok. Künü parnok Russia nunger akumtsü akok, mesüra makumtsüa akok," ta Trump-i US broadcaster Fox News den sensaksemba mapang ashi.

US-i Ukraine nem teyari agütsüba temelen "rare earth minerals" aginer, ta US leniri nenshia ashi.

"Sen aika yangji agütsü aser ni aji meyipa aginer ta ashir. Aser ni parnok dang kasaji, sen \$500 billion

jenjang rare earth aginer ta shiogo. Aser parnoki aji mulunger, anungji asenok tamachi bo masü," ta Trump-i ashi.

Ukraine Tir Volodymyr Zelenskyy indang chief of staff Andriy Yermak-ia The Associated Press news agency dang Ukraine-i US den tezüngzüktep nung inyaktsü jangra lir ta ashi.

Hokulbarnü US Vice President JD Vance ajurutsü alisang Zelenskyy-i Russia den ceasefire deal yanglura Washington nungi security guarantees tesashi aginer ta ashir, koba Trump-i tekeratiba nung renemtsü ta aiben shiogo.

NATO züngsem akumba mesüra peacekeeping troops tem yokba amala medeni rara anentsü jembira, ibaji ajanga Kremlin asendenshia ano amaktsü asoshi nok-nü bendentsü ang mapang agütsütsü, ta Kyiv tetsübo lir.

Hopta tatemlen Trump-i Russia Tir Vladimir Putin den jembi amai ashir, saka Moscow-ibo lenir ana tsüngta jembiba sangdonga mali.

Ajisüaka Ukraine nung azüdokshi manener, kong Russian sepaitemi Ukraine anüdoklen agiyonga aotsü meranger.



पावरग्रिड
POWERGRID

METETDAKTSÜR

1. North Eastern region nung North Eastern Region kübok Imphal S/s den sendaktepa aliba Transmission system kübok 2019-24 atema Transmission tariff yanglushitsü atema petition aser 2024-29 tariff blockatema petition.

2. Tekalen shia alima Transmission system nung tajangzük angurtem: a) Assam Power Distribution Company Limited (b) Meghalaya Power Distribution Company Limited (c) Government of Arunachal Pradesh (d) Power and Electricity Department, Mizoram (f) Electricity Dept. of Puducherry (g) DOP, Nagaland (h) TSECL

Particulars	Asset-1
Approved capital cost of the project	Rs. 5241.65 Lakhs (FR)
Approved capital cost of the project	Rs. 5185.89 Lakhs (RCE-II)
Authority which has approved the Capital Cost	Chairman and Managing Director
Scheduled date of commercial operation	30.09.2022
Actual date of commercial operation	22.11.2024
Capital cost on the date of commercial operation	Rs. 4109.62 Lakhs

3. Tariff details:

a) For 2024-29 Block

Rs. In lakhs						
Asset detail		2024-25	2025-26	2026-27	2027-28	2028-29
Asset-1	AFC	267.90	828.30	887.80	878.59	866.20

4. Determination of tariff atema application copy ka applicant indang website www.powergrid.in nung inokja lir.

5. Petition nung aliba determination of tariff atema proposals nung temelenshitsü aser tai aputsü lira, teyari agirtem densema nisung mashi kati Commission indang e-filing portal ajanga mesüra tezüluba nung Secretary, Central Electricity Regulatory Commission, 6th, 7th & 8th floor, Tower B, World Trade Centre, Naoroji Nagar, New Delhi - 110029 dangi (mesüra Commission indang office aliba address mashi dangi) petitioner indang copy ka dener corporate office dang iba sangdong adoker anogo 30 tsüngta yoktsüla.

Place: Gurgaon

Date: 06.02.2025

Chief General Manager (Commercial/RC)

Sd/-

POWER GRID CORPORATION OF INDIA LIMITED

(A Government of India Enterprise)

Corp. Office : "Saudamini", Plot No. 2, Sector-29, Gurugram-122001, (Haryana)

Reg. Office : B-9, Qutab Institutional Area, Katwaria Sarai, New Delhi-110 016

www.powergrid.in, CIN : L40101DL1989GOI038121

A Maharatna PSU

PG/CC/Notice-203/Advt-259/2024-25

12buba Inter-District Veteran Football asayamung tenzükogo



Dimapur, Tsüklai/February 11 (TYO): 12buba Nagaland Inter-District Veteran Football Tournament February 11 nü Peren district kübok Mhainamtsi Village Ground, Jalukie nung tenzükogo.

Iba asayamung ya Peren District Veteran Football Association (PDVFA)-i ayongzüka asayadar.

Asayamung lapokba sentong nung alakteta jaoker ama o jembiba mapang Advisor, Youth Resources & Sports, Nagaland, S. Keoshu Yimkhiung-i, iba asayamung ayongzüka atema NVFA & PDVFA nem tenüngsang agütsü aser pa jaokba atema kanga pelaba lemsatapa liasü.

Paisa, veteran tem dang takok marok dak dang merangloktsü, saka anema

alitsü nükjiding yur asayatsü ajungshia liasü. Piasa, parnok dang maneni asayatsü aser lanurtem ajungmesotsü mepeshia liasü.

Maneni Keoshu-i asayartem dang asayaba mapang team tanüla tajung benoka asayatsü ajungshiba den pei alidak tesemi meyipa aoba sülen lanur asayartem aser talisa under-age asayartem nem training tapet agüja parnok ajungkekttsü ajungshia liasü.

Sentong nungsa tir o jembiba mapang K. Kire, IPS (DGP Retd.) & President NVFA-i ashiba agi, iba asayamung ayongzüka asayaba nükjiding tongtibangtibaji veteran asayartem anema toktsütsü aser lanurtem football asayatsü asoshi ajungmesotsü

atema lir. Paisa, taküm iba asayamung nung district troki dang shilem agir saka taruba kümtem nungbo timbai shilem agitsü imlaba lemsatap.

Sentong nung Arup Zeliang, Convenor, PDVFA-i lokti pela agizükba o jembiba aser Pastor, RBCM Gaimunrei Gonmei-i Tsüngrem temaotsü meshizüka sarasadema liasü. Sentong nungsa tetsürtemi sobaliba tsüngsang ka saya aser asayamung omen ken ya ken mejemer aser kentener Namkamlak-i tena liasü.

Asayamung nung mezüngbuba asaya Mokokchung aser Mon na asayaba Mokokchung-i goal 2-0 agi kokogo.

Iba asayamung ya February 14 nü tashi asayatsü.

Alessandro ano AC Monza Head Coach kümogo



Tsüklai/February 11, 2025 (Agencies): Salvatore Bocchetti mapa nungi anentsüba sülen AC Monza-i ano Alessandro Nesta nem head coach mapa agütsüogo, ta iba Serie A club yagi metetdaksü.

Hopta tatemi tamakok tulu anguba sülen club tang bonglang nung aliba mapang ka nung Salvatore ya mapa nungi anenja liasü.

Bocchetti ya December ita Nesta melena shim aser 2027 küm June ita tashi atema tenangzüktepba yanglua liasü, ajisiüka pai aiba team yagi taoba league asaya tenet nung asaya ka dang akok aser Deobarnü Lazio goal 5-1 agi makokba ya Monza asoshi asaya pezübuba atonga makokba liasü.

Bocchetti lenisüba nung Monza pur Coppa Italia nunga Bologna pur goal 4-0 agi makokba sülen tsükogo.

Nesta taoba mapang Italy international team aser Lazio

o AC Milan nungi asayaogo aser pa Monza-i mapa nungi anentsüba sülen hopta tenet lir ano kasa club-i meyipa aruogo.

Toba season Raffaele Palladino-i Monza toktsür Fiorentina-i aoba sülen Nesta-i coach mapa agizüka liasü, ajisiüka pa Serie A nung mezüngbuba manager mapa inyakba mapang Monza puri league nung mezüngbuba asaya 17 nung ka dang akokba sülen pa mapa nungi anentsü.

Monza puri tang asaya aliba season nung asaya 24 nungi asaya ana dang koka parnok point 13 ngur lir aser parnok Dobarnü Lecce den asayatsü.

Djokovic Doha Open nung asayatsü

Tsüklai/February 11, 2025 (Agencies): Novak Djokovic, shiba Australia Open asayaba mapang tetsü yiruba ajanga masayatetsüsa aküm pai Hombamü ashiba agi, pa taneptsü nguogo aser iba ita Doha nung asayatsü aliba asayamung nung ATP title 100buba abentsü atema merangdangtsü asoshi renema lir.

"Ni tetsü shisar aliba kecha mali kümogo. Ni yiruba noklang nung noklang taneptsü tangur dang lir aser ni takok timba nguyonga aotsü renema lir," ta Djokovic-i Montenegrin newspaper Vijesti den sensaksemba mapang ashi.

"Ni training agitsü aser renemshitsü asoshi medical team-i temelaba agütsüogo.

"Doha nung asayamung ya anogo tenet lir tenzüksü aser ni renemer aliba ama dang asayatsü," ta pai ashi.

Australian Open nung otsüsütsüsa Grand Slam 25buba akoktsü atema Djokovic meranga asaya liasü, saka semifinal nung Alexander Zverev den asayaba mapang pa yiruba ajanga masayatetsüsa kumatok. Pa asaya nungi anenba mapang set ka mekoki liasü.

Arishi küm 37 tain ya quar-

ter-final nung Carlos Alcaraz madak takok anguba mapang yiruba ajanga timtema liasü.

Ajisiüka Djokovic tang Qatar Open nung asayatsü imlar, koba February 17 nü tenzüksü lir. Iba asayamung kokra pai ATP titles 100buba abentsü aser pa Jimmy Connors aser Roger Federer na den iba alizüng tongteter tasembuba akümtsü.

"Ni iba alizüng atongtsü atema taoba küm October ita nung merangdanga arudar. Ajisiüka ata lid.. kodang kokdir indangji akoktsü," ta Serbia nung asayar yagi ashi, shiba tang world No 7 asayar lir.

"Ni kanga kara taneptsü anguba atema Tsüngrem tenüng asanger. Ni küm 15 asaya aruba mapang dang nungi tawa timbaben yirur.

"Arishi küm timba kuma aoba ajanga asütsü akok, saka kü temangi ni tang tashi kanga junga tenzükdar aser kü tejangraba meremsepi lir," ta paisa shisem.

Taoba mapang world number one asayar ya taoba kuma French Open quarter-finals asayatsü lia temekok tachichilen yiruba ajanga masayatetsüsa aküm aser iba sülen meniscus surgery agia liasü.

ICC-i CEO tasen ka bushi tenzükogo

Tsüklai/February 11, 2025 (Agencies): International Cricket Council (ICC)-i Chief Executive Officer (CEO) tasen ka asoshi advertisement adoktsüogo. Geoff Allardice-i iba menden toktsütsü ta taoba ita sangdongba sülen tang iba jenjang agiogo.

Allardice ya ICC den küm 13 sendaka liasü aser 2021 küm November ita CEO asütsü shima liasü.

Allardice lenisüba nung international asayamung tongtibang aika takok ngua asayaogo, ajisiüka USA nung 2024 T20 World Cup asayabo temulung masü liasü. Asayamung tembangba sülen ICC-i committee ka tenteta iba asayamung ayongzüka asayaba asadanga liasü, koba sen tali intokba, sentong junga meyangluba aser asayaba tesem junga merenem aliba amala ken o agi meketbanger liasü.

Committee-i report magütsü tsünga ICC Head of Events Chris Tetley aser General Manager Marketing & Communications Claire Furlong nati tena mapa tokaja liasü.

Anti Corruption Unit head Alex Marshall-ia mapa toktsüba sangdonga liasü. ICC tang CEO tasen ka bushiba mapang lir, ajisiüka Champions Trophy tembangba sülenang jenjang agitsü, kechiyong application benoktsü atema tatembangbuba anogoji March 10 lir.

Kasa mapang nung Gaurav Saxena, Head of Events tekolak akümtsü renema lir. Pa lenisüba nung ICC communications department inyaksangshitsü. Pa tang Board of Control for Cricket in India (BCCI) indang General Manager, Operations lir.

BILEMDANGANG

"Merumeru nem nü yimya tamoksepdaksü."